

## In label per la giuventetgna

Avon siat onns ha la Gruppa svizra per las regiuns da muntogna (SAB) distinguìu la vischnaunca Lumnezia sco vischnaunca attractiva per giuventetgna. Ussa ha era la vischnanca da Tujetsch – la quarta el Grischun – quei label. Gievgia sera, a caschun d'ina dieta specifica cun 100 participonts, suenter la radunonza generala ad Andermatt, ha la SAB surdau ufficialmein il label cul tetel e logo special «Vischnaunca da muntogna. La giuventetgna – nies futur». Cun quel honorescha la SAB vischnancas che risguardan ils basegns dalla giuventetgna e laian conceder quella en damondas digl'avegnir. Ella val Tujetsch munta quei che giuvnas e giuvens ein envidai specialmein da gidar a sviluppar gl'avegnir e frenar la depopulaziun. En Tujetsch dat ei in local da giuventetgna e l'uniun da giuventetgna ei activa e funcziuna bein. Quella ha lu era inoltrau l'annunzia cul dossier pil label naziunal.

### Giuvnils han mo duas opziuns

En lur dossier han ils Tuatschins numnau pliras ideas per migliorar la situaziun e las cundiziuns generalas a favur dalla giuventetgna. *Daniel Schmid* ha representau ad Andermatt il dossier cull'annunzia. En sia vischnaunca s'engascha el pils interess dalla giuventetgna. El fa part dalla suprastonza dil Forum da giuventetgna dalla Gruppa svizra per regiuns da muntogna. Actualmein presidescha *Sarina Caduff* da Cumbel quei gremi. La giuventetgna sezza duei discutir gl'avegnir en regiuns da muntogna, aschia sappi quella eruir a moda directa ed agir leusunter, ei il messadi central. Suenter scola obligatorica, emprendissadi ni gimnasi dat ei per la giuventetgna ellas muntognas mo duas opziuns: restar ni ir giu la Bassa a rimnar experientschas. Damondas dalla mobilitad, la purschida da plazzas e novas fuormas da luvrar sco co-working completeschan projects ch'ei digns da migliorar.

Ils giuvnils han organisau sezs la dieta specifica ad Andermatt. Il Forum da giuventetgna dalla SAB secumpona da representants dallas differentas vischnancas che han gia retschert il label. Quei gremi ei era responsabels per surdar il label a candidaturas inoltradas. Regularmein s'inscuntran las giuvnas ed ils giuvens e formuleschan comunablamein propostas che la SAB promova e recamonda alla politica. Finamira eis ei da sebrattar, discutir ideas e promover quellas. Daners directs per projects survegnan las vischnancas denton buc per quella sparta. Sper Tujetsch ha era la vischnaunca Val de Bagnes (VS) retschert il label dalla SAB. Cun Tujetsch e Val de Bagnes ein exact 30 vischnancas distinguidas. Il logo ei concepìu aunc ussa sulettamein en treis lungatgs naziunals, il quart, il romontsch, maunca. (fmr/abc)